

23/05/2000

Ibu tidak duga Sothi jadi pilihan BN

PORT DICKSON, Isnin - "Anak lelaki yang pandai menjaga keluarganya, terutama kedua-dua ibu bapanya dan boleh menjadi seorang pemimpin yang baik untuk memberikan khidmat kepada masyarakat."

Itulah reaksi pertama K Ramayee, 57 - ibu calon Barisan Nasional (BN) bagi kawasan Parlimen Teluk Kemang, S Sothinathan, apabila ditanya wartawan mengenai pemilihan anak sulungnya sebagai calon BN bagi kerusi itu yang diumumkan Perdana Menteri, Datuk Seri Dr Mahathir Mohamad yang juga Pengerusi BN, hari ini.

Ketika ditemui di rumahnya di sini petang ini, ibu kepada empat anak lelaki itu terkejut dan tidak menduga langsung anak sulungnya itu yang bertugas sebagai Setiausaha Politik kepada Presiden MIC, Datuk Seri S Samy Vellu, diberi kepercayaan mewakili BN bertanding dalam pilihan raya kecil Parlimen Teluk Kemang.

"Sothi tidak pernah menceritakan apa-apa kepada kami dan juga isterinya, P Maheswary, 31, mengenai kemungkinan beliau antara beberapa nama pemimpin muda MIC yang disenaraikan sebagai calon.

"Malah, isterinya tidak dibayangkan langsung walaupun ada beberapa kalangan tertentu yang bertanyakan anak saya suatu hari nanti akan menjadi wakil rakyat.

"Kami sekeluarga bersyukur Sothi dipilih dan berharap kepercayaan yang diberikan pucuk pimpinan parti dan BN itu dipikul dengan penuh tanggungjawab," katanya yang tidak tahu langsung anaknya diumumkan sebagai calon sehinggalah kedatangan wartawan ke rumahnya, kira-kira jam 6.30 petang ini.

Ramayee sebelum ini pernah bekerja sebagai penoreh getah di sebuah ladang di sini dan suaminya, S Sinna Goundar, 68, juga pernah bekerja sebagai penoreh getah dan pemandu lori.

Sementara itu, Maheswary berkata beliau gembira dengan pemilihan suaminya itu sebagai calon dan terpaksa menyesuaikan dirinya terutama ketika membantu suaminya berkempen.

"Saya hanya mendoakan Sothi akan berjaya dan pemilihannya itu diharap menepati kehendak rakyat dan diterima dengan senang hati.

"Dia memang anak tempatan, lahir dan dibesarkan di sini sehinggalah berjaya menghabiskan pengajiannya di Universiti Malaya.

"Sebagai setiausaha politik menteri, dia memang jarang berada di rumah kerana tugas, tetapi saya memahaminya dan bebannya akan bertambah berat jika dipilih sebagai wakil rakyat," katanya.

(END)